

wot superintendenta nuzowany, zo so w l. 1855 emeritować da. Na jeho město so postaji za wučerja Julius Richter, Serb, rodź. w Slopišćach (Schleipzig) pola Lubina, kiž bě prjedy wot 1852—55 z wučerjom we Wjelcej. Wón ani słowčka serbski njewučí na rozsudźite žadanje Grodkowskeho superintendenta, runjež ma z džěćimi, hdyž do šule zastupja, přez wjele lět žadławu dračinu, doniž jeho z cyła zrozumja a što nawuknu. Wón rjeknu: „Unter großer Mühe wird ihnen das Deutsche eingebleut, es gehört dazu eine furchtbare Geduld und Uebung.“ Ale — eingebleut dyrbi byé!

Sedlišćan wobydlerjo běchu w zastarsku z džěla kralowskej domaenje, z džěla cyrkwi w Komorowje poddani a mjenuja so po tym hišće džensa „Domänenbauern“ a „Kastenbauern“. Prěńši mějachu wšelake kralowske služby, jedyn n. př. dyrbyeše psy kormić, druhi konje pasé a t. d.; posledniši płaća hišće džensa dawki do Komorowskeho cyrkwineho kašća (aerarija), z kotrychž so Sedlišćan duchowny a wučer mytujetaj. — Tak mjenowani starokhěžkarjo wužiwaju wjacj praw hač nowokhěžkarjo; woni maju n. př. z burami džěl na gmejnskej pastwje a holi. — Swoje časniki twarja sebi Sedlišćenjo zwjetša sami z drjewa; su to we wulkich kašćikach wulke koleska a rěkaju wšědnje „serbske zegarje“. — Khudžina dostawa dary z Budarjoweho wustawa; prjedy wudžělachu so tu tež pjenjezy z legata Franki w Budyšinje, kotrež pak so nětko jenož hišće w Komorowje samym rozdawaju.

Sedlišćan žónske maju hišće swoju narodnu drastu, mužscy nic wjacj. Tola hišće před krótkim khodžachu mužowje w kušich kholowach do kolen, dołhich škórnjach a njedospołnych nohajcach, kotrež so jenož kaž mufki na bristwja tykachu, zo bychu nahotu srjedź kholowy a škórnjow přikryte; na nozy samej njebě nohajca, ale słoma resp. kruch lapy. Při wulkich swjedženjach pak tčachu jich nohi w dołhich pyšnych bělych abo pisanych nohajcach a swětlych šnalojtych črijach. Na hłowje nošachu šěroki pjelšći kłobuk. Kemši khodžachu w dołhim kabaće ze šěreho hrubeho sukna z krótkim překasom (taillu) a dołhimi porčmami; předku swětletaj so dwaj dołhaj rjadkaj małych kónčojtych bublinkow. Tutón kabat dosta so kóždemu mandželskemu